

## 北海文史

### 第十三辑

# 金石碑碣

## 马鞍岭庙重建碑记

马鞍岭神农庙，肇年失记，考清初沿海迁界，海岸五十里内阒无烟火。迨康熙二十三年复界，农渔民始复旧业，民庆再造，信为神助，奉之，建庙疑在此时？清季重建，民国几经修葺，足证庙古而民崇之。

夫农为国本，自古已然。滨海边民，赖地利而渔农并举，各安其业，故首尊主宰耕稼五谷之圣神农焉；更以分宰捕鱼行舟之天妃娘娘、造船建屋之鲁班先生师配享血食，三神并祀，意祈年丰海晏艺嫻相托庇。故建庙初旨至善，时易世殊，固未可以蒙昧苛责先民也。

冠头岭为北海镇山，马鞍岭是其辅翼，庙建其巅，益增山川胜概，择地审势亦善，清明踏青，重阳登高，人多借山门一席之地小憩，觞咏览胜，驻足留连，其用更善，古刹得三善而恒存焉。一九六八年前后，庙被全毁，古榕亦遭斧钺，人多痛惜之！一九八四年改革开放，物阜民康，旅游业兴，为添山川文藻，流下村民发起修复古迹，醵资重建古庙，得南漓、石埭、新营、下村等村民襄助，于一九九二年三月十四日庀工，同年九月竣事，庙貌悉依原本。庙成，村民以记请予，并同申严禁假神惑众敛财规约，有感于裨益旅游业开发，乃当仁不让焉，义举多助，庶斯庙与海山永在也，是为记。

黄家蕃撰文书丹

一九九二年九月